

Mampaantsi

- 5** ⁴Tajorentsi! Tee pinaamatawo eeroka kaari kamethatatsiri,
Eero okanta raapatziyee-mi kaaripero-tatsiri.
⁵ Eero okanta itsipa-teemi kantakaa-perori-paeni.
Tema ikijaneentzimi eeroka ikaatzi antzirori kaari-perori.

Mampaantsi

Romampaani David Ikenkishirya Ishiya-pithateri Kowatsiri Rowamayeri

- 22** ¹Tajorentsi! Notajorentsits! ¿Iita pookawentan-tanari?
¿Iita kaari pipokanta powawijaa-koteena?
¿Iita kaari pikemantana nashironkaa-waeta?
² Tajorentsi! Nokaema-witzimi kitejepaeteki, teemaeta pakana.
Nomawitakawo tsireni-paeteki, teemaeta netsinaryaa-kotzi,
³ Roo kanteencha, eeroka tajorentsi
Tema pijeeki eeroka jempe romampahaeyani Israel-paeni.

⁴ Eeroka rawentaaka paerani nowaejatzite-paeni.
Rawentaa-yitakimi, pookakaa-wenta-yitakiri eeroka.
⁵ Ikowako-takimi pikijawen-tyaari, pimatakiro
pookakaa-wenta-yitakiri.
Rawentaa-yitakimi eeroka, tekatsi owashiwentaayiteerini.

⁶ Tema naaka atziri naawita, roo kanteencha ikimita-kaeta-kina
chowitsi.
Osheki imaninta-waetakina atziri-paeni, itheenka-shire-waetakina.
⁷ Ishironta-wenta-waetakina ikaatzi ñaayitanari,
Itsimetsi-kyawae-teetakina, roteka-yina-waeta, ikanteeyini:
⁸ “Piñaa-matsiteri awentaariri Tajorentsi. Añaawakiri aririka
ramitako-teeri.
Tema ikantatzi osheki ineshironka-tziri, añaawakiri aririka
rowawijaa-koteeri.”

- ⁹ Tema eeroka kantakaakawo notzimantakari omotzitakinaha
ashitanari.
Eeroka kantakaakawo nawentaan-tzimirí eenirowa nohotzi noteni.
- ¹⁰ Eeroka ashitakinari tekiraaha notzimi.
Eeniro nojeeki omotziki ashitanari, eeroka Notajorentsíte.
- ¹¹ Eero pijeeka-pithatana intéena, tema okaakitaki nokemaatsi-waetyaa.
Tekatsi kijakowente-nani.
- ¹² Tema ithonka rotzikakina kijaneentanari, roshiyakari ipiyoteeyani
waakapaeni,
Roshiyakari imashirenka poñaachari Kithoki-shaariki, ithonka
rinkitee-yakinani.^a
- ¹³ Pahaankaeyakini ikaatzi kijaneentanari,
Roshiyakari manitzi rowari iwathatsite, pirinkae-kimashitaki.
- ¹⁴ Tema noshiyakawo naaka njaa ijakoe-tziri,
Tema thonkaka okitho-ryaayitaki notonki.
Oshiyakawo najankane iwyaha-chari,
tema thonkaka iwyahaka inthomoeki.
- ¹⁵ Tema piryaa-kentsitakina, oshiyakawo opiryaatzi chomo-petoki.
Tsirekaka nonene nopatzi-thaanteki.
Tema pookakina jempe opiryaa-panetzi kepatsi nokami.
- ¹⁶ Tema roshiyakari otsitzi ipiyowentee-yakinani kaari-perori, ithonka
rinkita-paakina.
Iwena-watakina nakoki eejatzi noetziki.
- ¹⁷ Iyoshii-tashitaka nomashi, koñaa-pookitaki notonki.
Osheki ramina-mintha-takina kijaneentanari.
- ¹⁸ Ipawakaakawo nomaatha.
Inaaryaa-wentakawo riyotan-tyaari itzimi-rika ayironi.
- ¹⁹ ¡Rooma eeroka Tajorentsí, eero pookawentana!
Eeroka shintsi-takahaanari. Pipoki intsipaete pikijawentena.

Rojankinatakiri David.

Rashi yotaantzirori omampahaantsi.

40 ¹Amaanikiini noyeeri Tajorentsí.
Ari rowayempitataana, ari ikemaena nokaemirira.

^a 22.12 waakapeni = toro

- ² Rowawijaakotaana nokamaemi ikitatanteetenarimi.
 Rowawijaakotakina eejatzi oniyenami sumpowatha.
 Ikatziyakaana okijopathatzira kepatsi.
 Ramitakotaana nanashitantaari kameethari, tee nantziwawaeta.
- ³ Roma-mpaakahaanawo owakirari omampahaantsi.
 Eejatzi weshiryantsi, rootaki nokimoshirewentantariri Tajorentsi.
 Osheki ñaayitawakirori iroka, riyokitziwentayitakiro.
 Roowa rawentaantanakariri Tajorentsi.
- ⁴ Kimoshireri ikanteeya awentahaeyaarini Tajorentsi.
 Kaari aapatziyeyaaarini shamewaetatsiri,
 Kaari amanariri tajorentsiniro.
- ⁵ ¡Noyinkatharite! Tajorentsi, pitajonkawentantapiintee,
 Osheki poshiretapiinteeena,
 Tekatsi oshiyemini eeroka,
 Noñaawenawitakawo nokamanteri itsipapaeni atziri okaatzi
 pitajonkawentantayitakira.
 Roori kantzimaetacha oshekiperotanee jempe okaatzi kaari
 ryoteetzi.
- ⁶ Tee pikowamatsiteero ramayiiteemi ratsipetakaani, eejatzi
 rashitakahaetemiri.
 Tema pikemathatakahaanawo,
 Teera intaani onimotemi itayeetzimiri pirahaatsi, eejatzi ikaatzi
 ramayitzimiri rashitakaayitzimiri.
- ⁷ Pikeme nokante naaka: Ari nopolaki.
 Tema rojankinatakoyiitakina paerani.
- ⁸ Ari onimotakina nanteemiro okaatzi pikowakayinari.
 Oshiyawo pojankinashiretantayeenawomi pinintakaantani.

Mampaantsi

*Rojankinari David, ikantanaka Kamantantaniri Natán ishintsineentanakiri,
 tema ryotakoetakirowa rantakiro kaariperori imayempitakiro Betsabé*

- 51** ¹¡Tajorentsi! Eeroka neshironkatantaniri, pikaminthahaena.
 Tema eerokataki etakotantaniri, pipeyakoteenawo okaatzi
 nantakiri. ²Pipakaa-kahaenawo okaatzi kariperotakaakinari.
 Poetenteena nokaariperotakira.
³Niyotzi osheki nopiyathawaetakimi.
 Tee omata nomaejantero nokaariperotakira.
⁴Apatziro nokaariperotzimotakimi eeroka.
 Nantashitakawo okaatzi pipinkakaanari.
 Tema okaate pikanteeri eeroka, kametha otampatzikate,
 Eeroka kiteshireri pimatantawori pipiyakowentantzi.

- ⁵ Tema kaariperotakina naaka, ari nokantzita owakira notzimapaaki.
 Nokaariperotzita inthomoeki omotziki ashitanari, jaka anteetsirowa
 kaariperoyitatsiri.
- ⁶ Pineshironkatziri eeroka kameethashireri,
 Piyo-shiryakahaa-nawo piyotaninka.
- ⁷ Pikimitakaena poetetantyeenawomi kaawoshirontsi, eero
 nopsiswaetanta.
 Pikaawoshiteena, aritaki nokitamaatanee kameetha, ari
 nawijanakiro okaatzi okitamaatzi jiriniki.^b
- ⁸ Pikantakaeyaawo nokemanteyaaawori jempe ikimoshireteetzi,
 eejatzi jempe ithaamenteeta.
 Piwiriintapookiteena powatsinaawaetakina.
- ⁹ Pomanapithatyaawo nowaariperonka eero piñaantaawo,
 Posheteenawo maawoeni owaariperotakinari.
- ¹⁰ ¡Tajorents! Poeteshireteena.
 Powakirateenawo noshire, notampatzi-kashiretan-teeyaari.
- ¹¹ Eero pookawentana,
 Eero paapithatanawo Pitajorenka.
- ¹² Papiiteero pinintaakahaena pikimitaakiro paerani owakira
 powawijaakotakina.
 Potapi-shire-tantenawo roopirori Pitajorenka.
- ¹³ Rootaki niyotaanteeyaariri theenkimawaetzimiri okantakantziro tee
 ikemijanteemi eeroka,
 Ipiyashitanteemiri eeroka kaariperoripaeni.
- ¹⁴ ¡Apaa Tajorents!, Owawijaakotantaniri! Pipeyakoteenawo okaatzi
 nompojantaki.
 Ari nomampaawenteemi riyoetantyaari eeroka tampatzikashireri.
- ¹⁵ ¡Tajorents! Pithaamenta-cheratakaena.
 Nopinkatha-waante-tanteemiro nomampaani.
- ¹⁶ Tema te inimoteeme namashiwaetzimiri notayimiri natsipe-takaani.
 Te pikowaeri okatziyeenkata iyachaarinka notaashiwaetzimiri.
- ¹⁷ Tema rootaki pikowaperoteeri eeroka Tajorents! piñiina okatsi-
 tzimo-shire-teena okaatzi nantzimotzimiri.
 Tema ikaatzi ikemitakaanteetari riiperori ratsipetaeta tani itahaetzimiriri
 Tajorents!, riitaki atziri okatsi-tzimo-shiretziri iyaariperonka.
- ¹⁸ Paakameethateeri Kijakowentoni-jatzi, pineshironkateeri.
 Papiiteero pipiriinteero otantopaeni Apatziyaweni.
- ¹⁹ Ari rinimoteemiri itahaetziri ratsipe-takaetani
 kameetha-pero-tatsiri,

^b 51.7 kaawoshirontsi = hisopo

Riitaki mapero-teeroni okatziyeenkate iyachaarinka itahaetemiri,
maaroni ikaatzi rashitakaetzimiri itahaetziri.
Tema itahaeteemiri ipiraetari tahaerontsiki.^c

Mampaantsi

*Rojankinee-takiro romampa-a-wentee-tawo ikashiya-
kaakiriri Tajorentsi pinkathari David*

89 ¹Ashi nowaero nomampaeyaa, nomampa-a-wenteero ineshironka-teena Tajorentsi.

Nomampa-a-wenteeyaari, nokanteeri ikaate icharini-teeyaari: “Tee rookawentanta Tajorentsi.”

² Nokantee eejatz: “Ashi poyiro petakotanta.

Tee pipaashini-tanitzi, poshiyakawo inkite ashi oyiro jempe okanta roori.”

³ Ikantzi Tajorentsi: “Eenitatsi nokashiya-kaeriri ikaatzi niyoshii-teeri naaka.

Nokanta-pero-teeri nomperatanewo David, nokantziri:

⁴ ‘Eero nookawentaari ikaate piccharini-teeyaari,
Naaka kantakae-yaawoni rashì rowaero ipinkathari-wentantee.’ ”

(Pishowi-teeyini, pipiyompi-teeyini eepichokiini.)^d

⁵ Tajorentsi! Osheki ikimo-shire-wentakiro inkite-jatzi okaatzi pitajonka-wentantziri.

Osheki ikenkitha-takotakimi kiteshireriite ashi poyiro eeroka tee pookawentanta.

⁶ ¿Eenitatsima inkite-jatzi monkaat-yaarini Tajorentsi?

¿Eenitatsima oshiyarini Tajorentsi? Tema rawijiri riiperori jenoki-jatzi.’

⁷ Tema ipiyoteeyani kiteshireri-paeni ipinkatha-tziri Tajorentsi.

Maperori iriiperotzi rirori rawijanakiri ikaatzi piyowentariri.

⁸ Tajorentsi Naaperori! ¿Eenitatsima oshiyimini eeroka?

Eeroka shintsi-perori. Ashi poyiro pikyaaryoo-wentantz.

⁹ Otzimimo-tzimi eeroka pishintsinka pomaeryaan-tawori otamakaatzi inkaari.

Pimatxitawo eejatzi oshinkiryaa-takaani tampyaa.

¹⁰ Potsinampaakiri Ajahaariweni, poshiya-kaantakari kaminkari.
Tema eeroka shintsi-shempari, pomishiyakiri pikoshekani.^{89.10}

¹¹ Tema eeroka ashitawo maawoeni inkite eejatzi kepatsi.

Eeroka wetsikakiro kepatsi, eejatzi maawoeni tzimatsiri.

^c 51.19 ipiraetari = becerro ^d 89.4,37 Pishowi-teeyini, pipiyompi-teeyini eepichokiini = Selah 89.10 Ajahaariweni = Rahab = Egipto

- ¹² Eeroka wetsikakiro okaatzi tzimatsiri katonkonta eejatzi kirinkanta.
 Oshiyawaetaka omampa-a-tyeeyaami ochempi Piyopathee-toni eejatzi Pinkaetoni, opaeriyo piwaero.
- ¹³ Tema eeroka shintsi-shempari, eejatzi okimitaka pako.
 Tema osheki otsinampaantaki pakoperori.
- ¹⁴ Eeroka kameetha-shireri pipinkathari-wentantzi, eejatzi eeroka tampatsika-shireri.
 Osheki petakotanta, oshiyakawo roomi jewata-piinteemini pikyaaryooperotani.
- ¹⁵ Tajorentsi! Tema osheki ikimoshiretzi atziri thaamenta-chari romampaa-wentzimi,
 Oshiyakawo ranashi-tatyeemi jempe pikoñeetyaakotziri eeroka.
- ¹⁶ Ashi rowaero ikimo-shiretzi ipaeriyo piwaero.
 Ari rajahaawenteemi, tema eeroka tampatzika-shireri.
- ¹⁷ Mapero, jempe pikanta eeroka, ari okanta pishintsinka, eejatzi powaneenkawo.
 Tema apatziro pikanta-kaawo eeroka, aririka pikoyi, pimatziro pishintsi-takaana.
- ¹⁸ Ikimitawo Tajorentsi riimi otzikaako-mentotsi.
 Riitaki Itajorentsite Israel, Awinkatharite.
- ¹⁹ Paerani pikenkitha-waeta-kaakiri piiteshirerite, ikemakimi ishireki.
 Pikantziri: “Noneshironka-takiri ñaaperori.
 Nopinkathari-takaakiri ikaatzi niyoyaakiri nashitari naaka.”
- ²⁰ Noñaakiri nomperatanewo David.
 Nojee-patzii-totan-takari notajorenchaate.
- ²¹ Ashi noyiro notapi-wako-tantee-yaari nako.
 Ari oshintsi-shempa-takahaeri noshempa.
- ²² Eero rotsinampaeri ikaatzi koshekariri.
 Ari ikimitee-yaari kaari-perori, eero rotsinampaeri.
- ²³ Naaka thonkirini ikaate owayirityaarini.
 Nothonkaeri ikaate kijaneenterini.
- ²⁴ Tema kijokiro nokanteeri noneshironka-teeri,
 Okantakaawo ipaeryaa-piinteero nowaero otzimimo-tantee-yaariri ishintsinka.
- ²⁵ Ari nokanta-kaakyaawo ipinkathari-wentantee ijeeki inkaariki.
 Imatero eejatzi ipinkatharite ijeeki nijeaki-paeni.^e
- ²⁶ Ari ikantee-teena: “Tajorentsi! Eeroka ashitanari,

^e 89.25 Kantako-tachari jaka, riitaki Tajorentsi kantakae-yaarini pinkathari David ipinkatharite ipoñaakyaawo Antawoki Inkaari, rrijatzi pinkathari-tatsini poñaachani antawaaki eniki.

- Eeroka Notajorentsite, poshiyawo mapi nomana-mento omatantari nawijakotee.”
- ²⁷ Nokimita-kaanteeri naaka nantarite notyomi.
 Riitaki awijirini ikaate pinkatha-wenteeroni kepatsi.
- ²⁸ Rashi royo noneshironka-teeri rirori.
 Eero aminaashita okaatzi nokashiya-kaakiriri.
- ²⁹ Tema rashи rowaero ipinkathari-yitee ikaate icharini-teeyaari.
 Ari ikantee-tatyeero eeniro iñeetziri ooryaa jenokinta.
- ³⁰ Aririka ipakaakiro itomi noñaani,
 Eerorika riyata-kaero ithotyahero okaatzi niyotaa-kiriri,
- ³¹ Aririka ipiyatha-takyaawo nowinka-kaantani,
 Eerorika ikemijantziro nokanta-kaantani,
- ³² Ari nowajankitaakiri ipiyatha-takina,
 Nopajawenteeri ikaariperotakira.
- ³³ Eero nopakaemaetawo netakotee-yaari.
 Noejokiro-peroteeyaari, ashi noyiro notsip-a-tyaari.
- ³⁴ Eero nomaejantziro okaatzi nokashiya-kaakiriri.
 Eero nomaeeritzi nokanteri okaatzi nokaman-takiriri.
- ³⁵ Tema Naaka Tajorentsi kashiya-kaakiriri,
 Eero namatawi-tziri David, okaatzi nokantakiriri:
- ³⁶ “Ashi royo picharini ipinkatharitee pinampiki,
 Ari ikantee-tatyeero ipinkatharitee eenirowa iñeetziri ooryaa ejatzki kashiri.
- ³⁷ Ari ikantee-taatyeyaa ijeki, roshiyaaari kashiri,
 Ashi rowaero ijekae inkiteki.
- (Pishowi-teeyini, pipiyompi-teeyini eepichokiini.)

Mampaantsi

- 91** ⁹Tema poshiya-kaakiri Tajorentsi riimi itekatsitan-teetari,
 rootaki pawijako-tantaari.
 Poshiya-kaakiri Tajorentsi Jenoki-jatzi riimi pinampi.
- ¹⁰ Eero othonkaemi kaari-perori,
 Eero omateemi imantsiyanka ikaatzi jeeka-nampi-tzimiri.
- ¹¹ Aritaki rotyaanteemi Ronampiri Tajorentsi,
 Riitaki aamaako-wentemini jempe-rika pikinayite.
- ¹² Tema riitaki thomaawa-kimini
 Eero pompojan-tawae-tapaaka mapikinta.
- 103** ²⁰Ronampiri tajorentsiite, tzimatsiri ishintsinka,
 pithaamentee-yaari Tajorentsi!
 Tema eerokaete antzirori okaatzi ikantzimiri.
 Paamawentyaa, eero pipiyathatari rompera-tzimiri. ²¹Eerokaete
 maawoeni rowayirite, pikimo-shire-wenteeri Tajorentsi!

Eerokaete romperatani, panta-piinteeniri ikoyiri rirori! ²²Eerokaete
maawoeni rowetsikani Tajorentsi,
Pajahaa-wentee-yaari maawoeni jempe-rika-paeni
ipinkathari-wentantzi!

Tema najahaa-wentari naaka Tajorentsi noshireki!

119

⁸⁹Tajorentsi: Ari ashi owaatyero piñaani jenokintaki.

⁹⁰ Eeroka kyaaryoowenteerini maawoeni ikaatzi añaatsiri
paerani, eejatzi ikaatzi añaatsiri nimaeka, eejatzi ikaatzi
tzimaatsini paata.

Eeroka owetsikakirori kepatsi, rootaki opoñaantari otzimi.

⁹¹ Maawoeni okaatzi pinintakaantakiri, ari ashi owaatyero otzimae.
Tema maawoeni okaatzira tzimatsiri oshiyawaetakawo riimi
pomperatani.

⁹² Eeroka kimoshiretakaakinari piyotaakina.

Eromi piyotaakinami, aritaki aakinami nowashirenkari.

⁹³ Eero nopeyakoneenteero pikantakaantani,
Tema ari okanteeya pijeekakahena kameethaeni.

⁹⁴ Powawijaakotaana, tema pashitaanaha,
Nokemijantanakiro pikantakaantani.

⁹⁵ Kijokero rowawitakina thaenkantzinkari ikoyi ithonkaatenami.
Roori kantzimaetacha eekiro niyaatakaatziro nomonkaatziro
pikantakaantani,

⁹⁶ Noñaayitakiro thonkanitachari maawoeni oetarikapaeni,
Rooma pinintakaantani, ari ashi owaetaatyero roori.

Rajahaa-wentari Tajorentsi maawoeni rowetsikani

148

¹¡Pajahaa-wentee-yaari Tajorentsi inkiteki!

¡Pajahaa-wentee-yaari ojenokiperotzinta!

² ¡Pimateero eeroka ronampiripaeni tajorentsi, pajahaa-wentee-yaari!
¡Eeroka rowayiritepaeni inkite-jatzi, pajahaa-wentyaari!

³ ¡Eejatzi eeroka ooryaa, kashiri, pajahaa-wentyaari Tajorentsi!
¡Pimateero eeroka ikaatzi oorenta-chari, pajahaa-wentyaari!

⁴ ¿Pajahaa-wentee-yaari eeroka, Jenoki-pero-jatzi,
Pimateero eeroka, njaa jeekatsiri inkiteki!

⁵ Pajahaa-wentee-yaawo iwaero Tajorentsi,
Tema apatziro iñaawaetaki rirori, wetsika-yitanakimi eeroka-paeni.